

Dithero tsa Tirelano mo Kutlwanong

11/2015 Thero ka Sontaga wa bofelo morago ga moletlo wa Epifaniya, e le ka 25. 01. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno le kwadilwe mo go Jes. 60:2: **"Mme wena MORENA o tla go tlhabela jaaka letsatsi; kgalaleo ya gagwe e tla bonala mo go wena."**

1. Sefela sa 185 - 171/178

2. Thapelo: Morena, Modimo, Rara yo o mo legodimong, re a go leboga, ka o re senoletse Morwao, fa e le ene yo re tshwanetseng go mo utlwa. Morwa Modimo, Jesu Keresete, re a go leboga, ka o itshenoletse mo bathong, fa o le Mopholosi wa batho botlhe. Mowa o o Boitshepo, Modimo, Morena, re a go leboga, ka o re gogetse mo go Jesu Keresete, Morepholosi. Modimo wa nnete, o re thuse gore re nne le bopelokgale mo tirong ya thomo, re nne basupi ba gago mo bathong, re gogele batho mo go wena, re tlhoafalele tiro ya go rapelela tiro ya thomo, re e ntshetse dikabelo ka bopeloetshweu, re rate tiro ya thomo. O re utlwe ka ntlha ya ga Keresete. Amen.

3. Lefoko la Testamente e kgologolo le kwadilwe mo go Ekes. 3:1-14;
Epistolo ka fa thulaganyong ya 2 e kwadilwe mo go 2 Bakorinthe 4:6-10;
Efangele ka fa thulaganyong ya 5 e kwadilwe mo go Johane 12:34-41.

4. A go ipolelwe tumelo ya bokeresete!

5. Sefela sa 86 - 80/83

6. Thapelo ya mmadi wa thero.

7. Efangele ka fa thulaganyong ya 1 e ntšhwa e kwadilwe mo go Matheo 17:1-9, e re: "Morago ga malatsi a marataro Jesu a tsaya Peto le Jakobo le Johane, morwarraagwe, a tlhatlogela nabo mo thabeng e e kwa godimo ba le bosi. Foo a fetoga setshwano fa pele ga bone; sefatlhego sa gagwe sa phatsima jaaka letsatsi, diaparo tsa gagwe tsa nna ditshweu jaaka lesedi. Ke fa Moše le Elia ba bonala fa go bone, ba bua nae. Mme Peto a simolola go bua, a raya Jesu a re: 'Morena, go monate mo go rona go nna fano; fa ò rata, ke tla dira metlaagana e meraro fano, o mongwe e nne wa gago, o mongwe wa ga Moše, o mongwe wa ga Elia.' Ya re a sa ntse a bua, leru le le lesedi la ba ritifalela ka tshoganyetso, le lentswe la tswa mo lerung la re: 'Yoo ke Morwaake yo o rategang, yo ke mo itumelelang; mo utlweng!' Ya re barutwa ba le utlwa, ba wela fa fatshe ka difatlhego, ba boifa segolo. Foo Jesu a tla, a ba ama a re: 'Tsogang, se boifeng!' Ya re ba tsholetsa matlho, ba se ka ba bona ope, fa e se Jesu a le esi. Ya re ba fologa mo thabeng, Jesu a ba laela a re: 'Lo se ka lwa bolelela ope pono e, go tsamaya Morwa-Motho a tsosiwe mo baswing.'" Amen.

8. Thero: Baratwa mo Moreneng wa rona Jesu Keresete, kajeno ke Sontaga wa bofelo morago ga Epifania. Sebaka sa Epifania ke sebaka sa go gopola bogolo tiro ya go isa Efangele mo go baditšhaba. Sebaka sotlhe sa Epifania se rata go re tsoseletsa sešwa mo tshimologong ya ngwaga gore re gopole ka ngwaga le ngwaga gore tiro e sa le teng. A go se nne ope, yo o gopolang gore tiro ga e tlhole e le teng mo Aferika, mo merafeng ya ga etsho. Ke raya tiro ya go batla ba ba latlhegileng, ba ba timetseng, ba ba iseng ba itse Jesu, ba ba sa tliholeng ba mo sala morago. Ke raya tiro ya go ba rapelela gore ba bone nako ya go utlwa Lefoko, ba bone phatlha ya go tlihabologa, ya go boela mo go Keresete.

Tiro eo e tshwanetse go dirwa jaaka mo dipakeng tsotlhe, e tlhokega mo mafatsheng otlhe le mo merafeng yotlhe, e seng fela mo merafeng e e laolwang, le go buswa ke ba merafe e mengwe, le mo go yona e e ipusang tiro e tshwanetse go dirwa, gonne gantsi boipuso bo tsamaelana le boitaolo. Bana ba ba duleng mo taolong ya bagolo, gantsi ba gopola gore ba gololetswe go dira ka fa ba ratang ka teng, ba sa tlhole ba tlhokomela ditaolo tsa Modimo. Bagolo ba ba sa tliholeng ba le mo taolong ya barena ba e leng bakeresete, ba gopola gore ba golotswe le mo ditaolong tsa Modimo, ba re: Ba ipusa jaanong, mme tota-tota ba itaola fela, ba sa tlhole ba boifa Modimo wa nnete, le e seng go tlhokomela ditaolo tsa ona. Go maswe, mme go maswe bogolo, fa boipuso, jo bo bidiwang jwa kgololesego, bo ntsha batho mo tumelong ya bokeresete gore ba boele mo dingwaong tse di fapaanang, le go ganela le pholoso e e mo go Keresete Jesu. Ke gona ka moo ke a tiisa, ke re: Tiro e ntsi e teng mo bathong ba merafe yotlhe, le mono mo Aferika, jaaka e ntse e le teng le kwa Jeremane, gongwe mo mafatsheng a mangwe, bogolo fa go rutiwa le mo ponatsheong gore tiro ya thomo ke tiro e e nyatsang kgololesego ya motho yo o latelang tlhaloganyo ya gagwe le thato ya gagwe.

Ke raya le tiro ya go rapelela bakeresete botlhe gore ba dire tiro ya thomo ka tlhoafalo le ka lorato lo logolo. Ke raya tiro ya go kopa Morena gore a tsoseletse badiredi ba Lefoko gore ba latele dinku tse di timetseng tota, e se ka go latlha tumelo ya nnete, mme e le boitsholo ka fa ditaolong tsa Modimo; le tiro ya go kopa Morena gore a romele badiri mo thobong e kgolo ya gagwe, a tsoseletse makau le banna ba bašwa gore ba ineele mo tirong ya Morena ka go ya mo seminareng le go ipaakanyetsa tiro e kgolo ya go nna modiredi wa Lefoko mo Kerekeng.

Tlhoafalo eno ya go tlhoafalela tiro ya thomo le lorato lwa go e rata, Morena o rata go di tsoseletsa mo go rona le ka Efangele ya kajeno, gonne mo Efangeleng eno re utlwa ka thanolo gore go na le a le mongwe fela yo o nonofileng go ntsha batho mo tatlhegong ya bone, mo timelong ya bone, mo lefifing le le khurumeditse lefatshe. **Ke ene Jesu Keresete.** Ga go na yo mongwe. Ke ene fela. **Jesu ka nosi o itshenoletse, fa e le ene.** A dira jalo ka go galalediwa fa pele ga barutwa ba gagwe, jaaka re utlwile mo Efangeleng ya

kajeno. Ba mmona ka nakonyana e e khutshwane mo kgalalelong ya gagwe e a neng a na le yona go tswa bosenangtshimologo, a ntse a le mo go Rraagwe, a ise a tle mo lefatsheng, e a leng mo go yona, a sena go boela mo go yona ka letsatsi la tthatlogo ya gagwe. A itshenolela, fa e le ene, ka ditiro le ka dithero tsa gagwe, a bolelela batho gore ka ene go atametse puso ya Modimo mo go bone. Ke gona a ba bileditseng mo tthabologong le mo tumelong ya go dumela mo go ene, ya go dumela Efangele ya gagwe. A ba bolelela gore fa ba sa rate go dumela mafoko a gagwe, ba dumele ditiro tse a di dirileng, a re: Ke tsona tse di supang ka ga gagwe gore Rraagwe o mo romile. A itshenolela, fa e le ene Morwa Modimo, Mopholosi wa batho botlhe, le ka mafoko a a builweng ke ene teng mo thabeng. Ga a ka a dumelela Petoro gore ba ikagele metlaagana mo felong ga kgalalelo. A fologa le bone mo thabeng ya kgalalelo gore a ye mo thabeng ya dipogo, ya loso, ya sefapaano. Ka go ineela mo losong boemong jwa batho botlhe Morena Jesu a itshenolela bogolo gore ke ene Morwa Modimo yo o utlwileng Rraagwe, yo o rometsweng ke Rraagwe gore a ruanye batho le Modimo, a ba letlanye le ona, a golole batho mo tatlhegong ya bone, a ba ntshetse tefa ya molato wa boleo jwa bone.

Rraagwe a supa ka ga gagwe gore tota ke ene, ka a mo tsosa mo losong ka letsatsi la boraro, a re: Ke amogela setlhabelo sa gagwe. Yo o dumelang mo go Jesu ga a latlhege, mme o na le botshelo jo bo sa khutleng. Tota Modimo Rara ke Mosupi wa basupi botlhe wa ga Jesu, fa e le ene Rraagwe, Morwaaona , Mopholosi wa batho, jaaka re utlwa Efangele ya kajeno e re: "Yoo ke Morwaaake yo o rategang yo ke mo itumelelang; mo utlweng!" Modimo Rara o ne a supa fela jalo le kwa Joretaneng, fa Jesu a ne a kolobediwa ke Johane Mokolobetsi, a re: "Yoo ke Morwaaake yo o rategang, yo ke mo itumelelang." Mo thabeng ya kgalalelo Modimo Rara a oketsa bopaki jwa gagwe ka kaelo e kgolo ele e e reng: **"mo utlweng!"** Ke gore Modimo Rara o batla mo go rona gore re utlwe Jesu, re mo amogele, re dumele mo go ene, re se ka ra belaela sepe ka ditiro tsa gagwe le ka mafoko a gagwe. Mafoko a Jesu a a buileng ke Mowa, e bile ke botshelo. Ditiro tse a di dirileng, le fa e le ka go dira dikgakgamatso, le fa e le ka go tsamaya tsela ya gagwe go ya mo losong mo sefapaanong, tsona di a dira gore re dumele, fa Jesu yo e le Keresete, Morwa Modimo, mme ka go dumela re bone botshelo ka leina la gagwe. A re mo utlweng!

Le bone boMoše le Elia ba supa ka ga gagwe gore tota Jesu ke ene. Re utlwa mo Efangeleng ya kajeno, jaaka e kwadilwe ke Matheo gore ba bonala mo go Jesu, ba bua nae. Luka o re kwalela se ba buileng le ene ka ga sona, a re: "Ba bua ka ga bokhutlo jwa botshelo jwa gagwe, jo a tla bo feleletsang kwa Jerusalema." Ke gore ba supa gore Jesu yo ke ene tota, ene yo o ileng kwa Jerusalema go ineela mo losong lwa sefapaano ke ene yo o romilweng ke Modimo Rara gore e nne Mopholosi wa lefatshe. Kana ba bantsi jang ba ba setseng ba kgopesegile ka go utlwa gore Mopholosi wa bone ke yo o kileng a swela mo

logonnyeng lwa thogako. Mme boMoše le Elia ba re ke ene. Ee, baporofeti botlhe ba Testamente e kgologolo ba supa ka ga gagwe gore mongwe le mongwe yo o dumelang mo go ene, o tla bona boitshwarelo jwa dibe ka leina la gagwe. Ga go na yo mongwe. Ke ene fela.

Ene yoo yo o ineetseng mo khumanegong e kgolo mo lefatsheng leno, o ne a se na bonno mo ntlong ya baeti, a tlhoka bolao, mmaagwe a mo latsa mo segopong sa dipitse, a ipolela a re: "Diphokojwe di na le mesima, le dinonyane tsa leapi di na le dintlhaga, mme Morwa-Motho ene ga a na fa a ka latsang tlhogo teng." Mo losong lwa gagwe batho ba ne ba sa batle gore dinao tsa gagwe di gate mo lefatsheng, ba mmapolela mo sefapaanong. Ene yo ke Morwa Modimo, ke Mopholosi wa lefatshe, ke ene yo o nonofileng go ntsha batho mo lefifing la tatlhago ya bone, mo losong le mo thateng ya ga Satane. **Le barutwa ba gagwe ba supa ka ga gagwe gore ke ene.** "Ya re ba tsholetsa matlho, ba se ka ba bona ope, fa e se Jesu a le esi." Petoro a re: "Re basupi ba ba bonyeng borena jwa gagwe, gonne o amogetse tlotlo le kgalalelo mo go Modimo Rara, jale fa lentswe le le ntseng jaana le tswa kgalalelong ya borena, le tla go ene le re: Yoo ke Morwaake yo o rategang, yo o nkgatlheng." Johane a re: "Ra bona kgalalelo ya gagwe, e le kgalalelo e e lebanyeng yo o tsetsweng a le esi, e tswa mo go Rara, a tletse bopelotlhomogi le boammaaruri." Ba ne ba supa ka ga gagwe, fa e le ene, fa go se na yo mongwe. Ke ene fela.

A le rona re mo utlwe, re nne basupi ba gagwe! Re a itse gore o tsositswe mo baswing. Jesu o ne a batla gore ba didimale ka ga kgalalelo ya gagwe, a ise a tsosiwe mo baswing. Mme jaanong rotlhe re filwe go bua ka ga gagwe gore re se tlhajwe ke ditlhong, mme re nne le bopelokgale jwa go supa ka ga gagwe gore tota ke ene tsela ya go ya go Rara yo o mo legodimong, ke ene boammaaruri jwa gore baleofi ba itshwarelwe dibe ka ntlha ya gagwe, ke ene botshelo jwa nnete. A kitso eo e re tsosetse kajeno go tlhoafalela le go rata tiro ya thomo gore bontsi bo gogelwe mo go Jesu monongwaga. Amen.

9. Thapelo: Modimo, Mong-wa-thata-yotlhe, Rara yo o mo legodimong, re a go leboga, ka o ne wa galaletsa Morwao ka Lefoko le le neng la tswa mo legodimong. Ke gona re kopang mo go wena gore o re tsosetse ka Mowa o o Boitshepo wa gago gore re tlhoafalele go utlwa Morwao, re amogele Lefoko la gagwe ka tumelo, re tshale ka fa lona mo lefatsheng leno le morago mo kgalalelong mmogo le boMoše le Elia le baitlhaoledwi botlhe mo thabong e e sa feleng, ka ene Morwao yo o rategang Jesu Keresete, Morena, Mopholosi wa rona. Amen. Thapelo ya Morena: Rara wa rona yo o mo legodimong ...

10. Sefela sa 84 - 78/81

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. A. W. Weber, ka ngwaga wa 1979/2003/2014.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.